

## Бетховен

ЖАРИЯЛАНДЫ 22.01.2023	ТІРЕК СӨЗДЕР Мұқағали Мақатаев	СІЛТЕМЕ <a href="https://bilimger.kz/129655/">https://bilimger.kz/129655/</a>
--------------------------	-----------------------------------	--

## БЕТХОВЕН

Сәнімен емес,  
Әнімен оған қымбатты,  
Қырық мың ғалам,  
Қырық мың түрлі үн қатты.  
Көзімен көрмей, әлемнің мына бояуын,  
Көңілімен ғана керемет сазын тыңдапты.  
Жетімек бұлттар жер ауып, қайда көшеді,  
Өшеді қашан бүгінгі және кешегі?  
Дауылдың соғар,  
Жауынның жауар шақтарын,  
Бетховен ғана дыбыстан сезген деседі.  
Сыйқырлы үнмен сыбырлап оған тұр ғалам,  
Ғалам да оны,  
Ғаламды ол да тыңдаған.  
Сынымен емес, сырымен Айдың сәулесі,  
Сорғалап соның саусақтарымен жырлаған.  
Қия алмай оны,  
Қиылып айлы түн кетті.  
Жалауын алып, жеңімпаз жаңа күн жетті.  
Жым-жылас, жым-жырт, таскерек етіп тәңірі  
Табиғат та оны күндеген екен, білмепті.  
Сыңғырлап үні,  
Күмбірлеп күйі бұрқанбай,  
Дүние тынды...  
Тілі кесілген мылқаудай.  
Айлы кештердеи сорғалап сазды күн тамбай,

Құлазып қалды қу тірлік өлі вулкандай  
Не дерсің мына таскерең мылқау шақтарға!  
Дыбыссыз бәрі — орман да, тау да, бақтар да.  
Тек қана аспан азан сап оған естіртті,  
Керең тірлікті қалдырып бара жатқанда.  
Күркіреп аспан,  
Ойнатты-ау дейсің жасынды,  
Сайратты-ау дейсің мелшиген тау мен тасыңды.  
Мылқаудың үні, кереңнің құлағы ашылды,  
Кешірім сұрап,  
Бәрі де оған бас ұрды.  
Мұқағали Мақатаев

**ҚМ АА** Куәлік нөмірі: **KZ45VPY00102718** — ҚР Мәдениет және Ақпарат министрлігі

© 2026 **Bilimger.kz** Ақпараттық-танымдық білім порталы. Барлық мазмұн авторлық құқықпен қорғалған.